

## LISTOVI...

GRAČANIČKI GLASNIK  
časopis za kulturnu  
historiju

Broj 43, godina XXII  
maj, 2017. [str. 161-169]

© Monos 2017

# Listovi gračaničkog kalendara od 11.11.2016. do 18.4.2017. godine

---

**Prof. dr. Omer Hamzić**

---

**11. 11. 2016.**

**“Fortuna” u stečaju – odmah nakon odluke,  
217 radnika ostalo bez posla, ostali strahuju za  
svoju budućnost**

Po svemu sudeći, golemi problemi ove najmnogoljudnije proizvodne firme u Gračanici (preko 1.200 zaposlenih), koja se smatrala vodećom kompanijom u obučarskoj grani u BiH, nakon otvaranja stečajnog postupka, kulminirali su sukobom nezadovoljnih radnika i menadžmenta, blokadom firme, čak i fizičkim obračunom, koji je srećom prošao bez težih posljedica. Vijest o stečaju i zaoštavanju situacije u javnosti je dočekana sa iznenađenjem, jer su problemi ove fabrike godinama “trpani pod tepih”, pored ostalog i u uz podršku politike i struktura vlasti. Cilj je bio da se preduzeće što duže održi “na nogama” i sačuva kakav-takav socijalni mir i zaposlenost. Sve to je, očigledno, očigledno, posljedica odabranog koncepta privatizacije, promašaja u poslovnoj politici, prevelikog zaduživanja, dugovanja iz prethodnih godina itd. Stečajni upravitelj, Muhamed Hadžić, koji je tek nedavno “uveden u posao” pozvao je “na mirno rješavanje problema”. U nastojanju da pronađe najbolja rješenja za radnike koji će ostati bez posla, ostvario je dobru saradnju sa tvorničkim sindikatом. Prioritet je (1) da vi radnici budu materijalno zbrinuti i prijavljeni na biro te da im se omogući zdravstveno osiguranje, (2) da se popiše i fizički zaštiti imovina preduzeća. Nakon toga će, kako je rekao, uslijediti “naredni pravni lijekovi”. Niko ne zna odgovor na pitanje koliko će biti “gorki” ti lijekovi i šta će biti sa gračaničkom “Fortunom”. Mnogi, a najviše radnici i njihove porodice, strahuju da će

LISTOVI...

se i u ovom slučaju ponoviti scenarijo iz Fabrike obuča "Aida", koja godinama "niti živi, niti umire" u grupi tuzlanskih, u privatizaciji, uništenih firmi.

### 1.12. 2016.

#### **Konstituisano ("uvedeno u posao") novo Općinsko vijeće u Gračanici**

Odmah nakon položene vijećničke zakletve, nagodbom političkih stranaka koje "participiraju" u vijeću, za predsjedavajućeg je izabran novinar Radio Gračanice Nihad Krajinović (SDP), a za zamjenika Almedin Devedžić (SDA). Inače, SDP i SDA u Vijeću imaju po devet, Naša stranka i Stranka za BiH po tri, Socijaldemokratska unija (SDU) i BPS Sefer Halilović po dva i konačno DF i BOS po jednog vijećnika. Radi ušteda u Budžetu, Vijeće je pokrenulo inicijativu za izmjenu Statuta općine Gračanica, koja bi omogućila deprofesionalizaciju funkcija predsjedavajućeg OV-a i njegovog zamjenika, a to znači volonterski status i dvojice novoizabranih čelnika Vijeća. Konačna odluka o tome očekuje se na jednoj od sljedećih sjednica Vijeća.

### 8. 12. 2016.

#### **Početak radova na izgradnji prve mini hidrocentrale na rijeci Spreči – dobar primjer međentitetske saradnje**

Mini hidroelektrana gradit će se na lokalitetu koji udaljen oko 1000 metara uzvodno od mosta na putu Petrovo – Orahovica. Investitor je privredno društvo "EEH Hidrogradnja" iz Gračanice, rok završetka radova–kraj novembra 2018. godine. Ovo je saopšteno na sastanku predstavnika investitora i načelnika opštine Petrovo (RS) Ozrena Petkovića i njegovih saradnika.. Inače, spomenuta firma na ovom projektu aktivno radi već šest godina. Napokon je, nakon brojnih procedura i ispunjenja propisanih uslova, sredinom novembra 2016. stiglo i Rješenje o odobrenju za gradnju, čime su se stekli uslovi za početak

radova. Na terenu je već počelo iskolčenje rijeke Spreče, slijede radovi na čišćenju i uređenju riječnog korita u dužini od oko 2500 metara, a potom i izgradnja objekta mini hidroelektrane. Takođe, na obje obale rijeke uzvodno od pomenutog mosta, biće napravljeni pristupni putevi, radit će se "zatezanje" obala a jedan dio biće učvršćen i kamenom podzidom.

"Sve što budemo radili na uređenju desne radićemo i na lijevoj obali rijeke, osim u dijelu ušća Jadrine u Spreču, gdje je minsko polje. Međutim, čim se navedeni lokalitet očisti od mina naknadno ćemo izvršiti i uređenje tog dijela. Također, spremni smo da učestvujemo u finansiranju sanacije mosta na rijeci Spreči, u iznosu od 50% neophodnih sredstava, što prema predračunskoj vrijednosti radova iznosi oko 50.000 maraka", izjavio je za medije direktor "EEH Hidroenergija" Edin Osmanović. Načelnik opštine Petrovo Ozren Petković je potvrdio da će njegova opština, kao i opština Gračanica, od ovog projekta imati višestruku korist: "Riječno korito će biti očišćeno i uređeno u dužini od 2,5 kilometra, što će spriječiti plavljenje okolnog zemljišta. Umjesto sadašnjih zaraslih i zapuštenih obala imat ćemo uređene obale a povrh svega, budžet opštine će imati redovan godišnji prihod na ime koncesione naknade", istakao je Petković.

U proceduru dobijanja neophodnih rješenja i dozvola za gradnju mini hidroelektrane bile su uključene nadležne institucije i Republike Srpske i Federacije BiH kao i opštine Petrovo i Gračanica.(Izvor: gportal.info)

### 12. 12. 2016.

#### **Održana 2. sjednica Općinskog vijeća Gračanica: deprofesionalizacija predsjedavajućeg Vijeća i prve projekcije Budžeta za 2017.**

To su dvije tačke koje su najviše zaokupile pažnju na prvoj radnoj sjednici Općinskog vijeća nakon lokalnih izbora. "Odluka o iz-

mjenama Statuta” odnosi se na deprofesionalizaciju mjesta predsjedavajućeg što u prevodu znači da bi predsjedavajući u narednom periodu radio bez plate na volonterskoj osnovi. Na ovaj bi se način smatraju vijećnici uštedilo 240 000 KM. Zaključak je da se javna rasprava o toj odluci održi u narednih sedam dana, što je znak da se u tom pogledu vijećnicima poprilično žurilo.

Obrazlažući Nacrt Budžeta za 2017. godinu, Općinski načelnik Nusret Helić je, između ostalog naglasio da je “naš Budžet uvijek bio realan, što potvrđuje i činjenica da smo sve ove godine bez deficita, što nam je obezbijedilo visok rejting kod banaka, međunarodnih organizacija i donatora. Budžet općine za 2017.godinu iznosi 10.786.125 KM, a sastoji se od: Prihoda 10.233.125 KM, Primitaka 105.000 KM, Višak sredstava iz 2016. god. 448.000 KM i Izdataka 10.354.000 KM. Ovaj budžet je u odnosu na ovogodišnji budžet manji za blizu 2 miliona KM”. U ovom obliku Nacrt je upućen na javnu raspravu.

Spomenimo još da su na ovoj sjednici imenovane komisije Općinskog vijeća a usvojena je i Odluka o aktivnostima na uspostavi trezorskog načina poslovanja općine Gračanica kao i Odluka o uspostavi registra budžetskih korisnika

## 12. 12. 2016.

### **Mladi muzičari iz Osnovne škole “Hasan Kikić” iz Gračanice osvjetlali obraz na takmičenju u Austriji**

Riječ je o Drugom međunarodnom takmičenju harmonike pod nazivom “Akkordeonfest”, održanom u Grazu (Austrija), 27. 11. 2016. godine, na kojem je učestvovalo više od 100 takmičara iz Austrije, Bosne i Hercegovine, Rusije, Ukrajine, Hrvatske, Srbije i Crne Gore.

Osnovnu školu “Hasan Kikić” predstavljali su učenici klase profesorice Alme Kurtić, Mirzete Sakan i magistricе Dženane Subašić. U kategoriji solo harmonika učenici Aida

Halilčević i Adnan Maleškić osvojili su dvije treće nagrade, a u kategorije ansambla učenici naše škole osvojili su dvije prve nagrade. Školu su predstavljali sljedeći učenici: Lejla Helić, Adnan Maleškić, Nadija Kakeš, Aldin Smajlović, Salim Šabić, Amira Avdić, Nadija Kovačević, Aida Halilčević, Samra Hasić i Semir Mujačić. (Izvor: <http://juoshk.com/>)

## 15. 12. 2016.

### **“Gračanički glasnik”: promocija 42. broja u BKC Gračanica (tema: stare gračaničke mahale)**

Promocija je održana u prostorijama Šah kluba u BKC Gračanica u prisustvu većeg broja građana, poštovalaca i saradnika Časopisa. Sadržaj ovog broja predstavio je prof. dr. Omer Hamzić, glavni i odgovorni urednik, a potom su se obratili neki od autora objavljenih priloga i članaka: mr. sc. Fatima Bećarević, Ago Mujkanović, prof. iz Tešnja (prilog o poginulim i ranjenim u Prvom svjetskom ratu s područja sadašnje općine Gračanica), te mr. sc. Rusmir Djedović i Edin Šaković, MA–koji su šire elaborirali temu ove promocije: starim gračaničkim mahalama s posebnim osvrtom na mahalalu Lipa. Promociju su upotpunila i pitanja, komentari i prijedlozi prisutnih čitatelja i prijatelja našeg časopisa. Izdajamo riječi novinara TK Fahrudina Kurtovića: “Hvala doktoru Omeru Hamziću i Redakciji “Gračaničkog glasnika”, što su otkrili ono što smo mi pogubili, što su istražili ono od čega smo mi znali pobjeći, što su nam pomogli da počnemo poštovati ono čega smo se ponekad stidjeli. Hvala vam što se nam omogućili da o sebi mislimo da smo bolji ljudi nego što jesmo. Hvala vam što nam pomažete da se više cijenimo i poštujemo. Sasvim sigurno, Vi ste mnogima u Gračanici pomogli da budu bolji ljudi i da Gračanica bude bolji grad.”

## 16.12.2016.

### **Na Rukometnom igralištu otvorena druga sezona klizanja u Gračanici**



Nakon prošlogodišnjeg punog pogotka sa postavljanjem ledene plohe (klizališta), općinski dužnosnici su odlučili da i ove godine svojim sugrađanima podare ovaj prelijep zimski ugođaj. Općina Gračanica je generalni sponzor a značajnu podršku su i ove godine pružili gračanički privrednici. Oni najmlađi, kojima je ovo prije svega i namijenjeno sa nestrpljenjem su čekali da izađu na led a prve noći klizanje je besplatno za sve. Klizalište će biti otvoreno do kraja januara, a cijena jednog sata klizanja biće 2 KM.

#### 20. 12. 2016.

**Umro Tajib Omerdić, načelnik Policijske uprave u Gračanici u predvečerje rata 1992. godine, nosilac Ordena Patriotske lige**

Rođen je 1948. godine u Stjepan Polju, gdje završio osnovnu školu, da bi školovanje nastavio u srednjoj rudarskoj školi u Sloveniji. Igrom slučaja zaposlio se kao policajac u Jastrebarskom. Napredujući u struci, završio

je studij kriminalistike u Zagrebu. Sticajem okolnosti, nakon prvih demokratskih izbora, 1990. pozvan je da se vrati u rodni kraj i u maju 1991. postavljen za načelnika Policijske uprave u Gračanici. U tom turbulentnom vremenu, odmah se našao na meti srpskih ekstremista, koji su u njemu vidjeli veliku prepreku za ostvarenje svojih ciljeva, jer je zahvaljujući svom profesionalnom iskustvu uspješno razobličavao i suprotstavljao se njihovim namjerama. Kako ga nisu mogli regularno smijeniti, pokušali su ga likvidirati u napadu na njegovu kuću u Stjepan Polju u rano proljeće 1992. Iako je aktivno učestvovao u organizaciji otpora i odbrane, pod čudnim okolnostima, voljom politike iz Sarajeva smijenjen je sa funkcije načelnika i poslat u mirovinu... Nakon završetka rata odlikovan je Ordenom Patriotske lige... (opširnije: u rubrici "Likovi zavičaja" na stranicama ovog broja našeg časopisa).

#### 23. 12. 2016.

**Izbor sportiste općine Gračanica za 2016.**

I ove godine manifestacija je održana u organizaciji Sportskog saveza, a pod pokroviteljstvom Općinskog načelnika. Priznanja su dodijeljena sljedećim pojedincima i sportskim kolektivima: Azema Letić, članica Ženskog odbojkaškog kluba Gračanica "Fortex" i Vahid Kahrmanović, igrač Nogometnog kluba "Bratstvo", proglašeni su *za najbolje sportiste* općine Gračanica u 2016. godini. *Za najbolje sportske kolektive* proglašeni su ŽOK Gračanica "Fortex" i NK "Bratstvo". *Najuspješniji juniori* su Hasan Mujanović nogometaš "Mladosti" iz Malešića i Adela Husamović članica judo kluba Pribava. U *kadetskoj konkurenciji* nagrađeni su rukometni reprezentativac BiH i član RK "Gračanica", Omer Mehmedović i Nadja Škapur članica Ženskog rukometnog kluba "Gračanica First". U *pionirskoj kategoriji* nagrade su dobili Nedim Krajinović iz RK "Gračanica" kao najbolji golman u

svom uzrastu u BiH, koji je nagradu dobio na završnici državnog prvenstva ,gdje je njegova ekipa osvojila drugo mjesto i Mubina Rešidbegović članica karate kluba Gračanica. Nagrade za *perspektivne sportiste* dobili su Adna Kunić (judo klub Pribava) i kata tim Karate kluba Gračanica.

Za *najuspješnijeg profesora* tjelesnog odgoja nagradu je dobio Nedim Šišić dok je *najbolji nastavnik* Nermin Hodžić iz Osnovne škole Donja Orahovica a ova škola je proglašena i za najbolju. *Posebno priznanje za razvoj sporta* dobio je Mustafa Omerović iz Nogometnog kluba "Jedinstvo" Lukavica a posthumno su priznanja uručena članovima porodica profesorice tjelesnog odgoja Safije Gopo, Ismeta Đulića i Venada Huskića.

*Plaketu za životno djelo u oblasti sporta i fizičke kulture* dobio je predsjednik Sportskog saveza općine Gračanica, dr. Osman Bukvić. Nagradu za *najuspješnijeg sportskog radnika* dobio je prvi čovjek ŽOK-a Gračanica Fortex, Ibrahim Žunić a najuspješniji trener je Zorica Bošković iz rukometnog kluba Gračanica. (izvor: <http://www.opcina-gracanica.ba/index.php/bs/?start=30>, 24. 12. 2016.)

#### 24. 12. 2016.

##### **Zatvoren Hotel "Tilija" u Gračanici**

Tu su vijest Gračanlije primili sa iznenađenjem iako su mnogi znali da se ovaj jedini hotel u gradu sa dvadesetak soba već duže vrijeme suočava sa problemima i teškoćama i da je imao slabu posjetu. Hotel je izgrađen daleke 1957. godine i sve do sada radio uspješno i u kontinuitetu, čak i u vrijeme rata. Činio je kičmu nekadašnjeg gračaničkog ugostiteljskog preduzeća "Park", pod čijim je nazivom i poslovao sve dok preduzeće, prije 2000. godine, nije krenulo u proces privatizacije. Imajući u vidu solidnu opremljenost hotela, pa i kvalitet osoblja, može se pretpostaviti da su menadžersko-vlasnički nesporazumi u pozadini odluke o zatvaranju hotela. Slaba posjećenost, a prije svega neiskorištenost

smještajnih kapaciteta hotela, zasigurno je dovela do ekonomskog posrtanja ovog ugostiteljskog objekta. Ostaje otvoreno pitanje da li su uzroci te slabe posjećenosti bili posljedica unutrašnjih slabosti samog hotela ili opće stagnacije Gračanice, koja je, očigledno, postala neinteresantna turistima i drugim namjernicima, a zbog općih prilika možda i privrednicima. Sudeći po uspješnom poslovanju hotela od 1957. godine, takvo stanje nije bilo u prošlosti Gračanice. Možda će novi vlasnik, koji se najavljuje, ipak nastaviti tu tradiciju. A možda starog gradskog hotela, za koji su vezane lijepe uspomene mnogih Gračanlija više neće biti u toj funkciji...

#### 29. 12. 2016.

##### **Održana treća sjednica Općinskog vijeća Gračanica: usvojen Budžet, a priča o deprofesionalizaciji funkcije predsjedavajućeg bila samo farsa.**

Izmjene Statuta Općine, koje bi omogućile spomenutu deprofesionalizaciju nisu izvršene jer nije bilo potrebne dvotrećinske većine za takvu odluku. Predsjedavajući Općinskog vijeća Gračanica će tako i dalje svoju funkciju obavljati kao profesionalac, a sva priča o uštedama na deprofesionalizaciji bila je obična farsa. Usvojen je budžet u iznosu od 11,4 miliona KM i u odnosu na nacrt "napuhan" za još 620 000 KM. Usvojena je i odluka o održavanju izbora u mjesnim zajednicama, program rada Općinskog vijeća, te informacija o stanju zaštite građana od neeksplozivnih i minsko eksplozivnih sredstava na području općine u 2016. godini.

#### 26. 12. 2016

##### **"Eco fashion show" u BKC u Gračanici: "Reciklirano, a moderno!"**

"Eco fashion show", naziv je projekta Manekenskog studija KUD-a Adem Alić, koji se predstavio gračaničkoj publici, na gala predstavi u velikoj Sali BKC. Učestvovali su čla-

novi Manekenskog studija i učesnici radionica za recikliranje i primijenjenu umjetnost dizajna. Tokom večeri, publici je pokazano osamdeset modela u tri kolekcije. Riječ je o sasvim drugačijem i novom modnom pristupu, posebno kada se radi o materijalima i dizajnu. Ne krijući zadovoljstvo nakon predstave, voditeljica ovog projekta, Seada Delić, inače vrlo uspješna modna kreatorica iz Gračanice, posebno u radu sa djecom izjavila je sljedeće: "Potrudili smo se da damo neku novu vrijednost recikliranim modelima i, suđeci po reakciji publike, u tom sasvim sigurno uspjeli". (izvor: <http://bkc-gracanica.ba/>, 27. 12. 2016.)

## 20. 1. 2017.

### **Mladi akademski slikar iz Gračanice Semir Osmanhodžić, uspješno organizovao kurs slikanja za ljubitelje likovne umjetnosti u Gračanici**

Njegovu ideju i inicijativu podržao je Bosanski kulturni centar, koji mu je ustupio likovni atelje i obezbijedio neophodan materijal za 22 prijavljena polaznike kursa. Nakon tromjesečnog rada, ostvarenja svojih "kursista", Osmanhodžić je pokazao publici na posebnoj izložbi u BKC, koja je propraćena kao svojevrsno osvježanje za ljubitelje likovne umjetnosti u Gračanici. Mladi umjetnik, pun entuzijazma, zadovoljan je sa "svojim đacima", koji su uspješno savladali vještine slikanja i najavio okupljanje i upis sljedeće generacije. Nije li na pomolu neka posebna škola slikanja ili likovna kolonija u Gračanici? Za tako nešto, osim entuzijazma mladog umjetnika, neophodna je dobra volja i podrška nadležnih.

## 22. 1. 2017.

### **Izbori za članove vijeća mjesnih zajednica na području općine Gračanica**

Riječ je o uobičajenoj proceduri koja se provodi nakon svakih općinskih izbora. Obavljeni su u svim mjesnim zajednicama, kojih ima 23 na području općine i to, kako je predviđeno Odlukom Općinskog vijeća, na zborovima građana u vremenu od 12.00 do 18,00 sati. Pravo glasa imaju svi punoljetni građani, upisani u birački spisak Centralne izborne komisije BiH. Biraju se kandidati političkih stranaka koje su na posljednjim lokalnim izborima osvojile određen broj mandata za vijeća mjesnih zajednica. Da bi izbori bili proglašeni uspješnim potrebno je da na birališta izađe najmanje 5% građana, upisanih u birački spisak. Putem nadležnih organa općine građani su pozvani da se odazovu pozivu Izborne komisije za izbore u mjesnim zajednicama i glasaju za nova vijeća mjesnih zajednica. U odnosu na lokalne i opće, za ove izbore, inače, građani ne pokazuju nikakav interes. Ipak izbori su uspjeli u svim mjesnim zajednicama, osim Gračanice, Lukavice i Gornje Lohinje (koji su ponovljeni 5. 2. 2017.).

## 31. 1. 2017.

### **Održana četvrta sjednica Općinskog vijeća: povučena Odluka o proglašenju izbora u mjesnim zajednicama zbog manjkavosti i Strategija lokalnog razvoja do 2020., koja je data u javnu raspravu...**

...ali su bez rasprave usvojeni sljedeći, valjda manje važni materijali: Program rada Općinskog načelnika za 2017., Informacija o stanju sigurnosti na području naše općine, izvještaji o rješavanju upravnih stvari u upravnom postupku u službama za upravu Općine Gračanica, o realizaciji rada Općinskog vijeća za 2016. godinu...Na kraju sjednice je usvojena i informacija o realizaciji projekta harmonizacije katastarskih i zemljišnoknjižnih podataka za katastarske dijelove Gračanice, Gornje Orahovice, Donje Lohinje, Pribave i Donje Orahovice.

**4. 2. 2017.****...i stručnjaci potvrdili zagađenost tla u Sprečkom polju kao da se to nije znalo, ali šta dalje...**

U izvještaju Federalnog zavoda za agropedologiju o monitoringu donjeg toka rijeke Spreče za 2016. godinu, uz ostalo je navedeno da su na 24 mikrolokacije utvrđeni sadržaji žive u tlu, iznad dozvoljene granične vrijednosti. Povećane vrijednosti ovog, po zdravlje ljudi, vrlo opasnog *teškog metala*, kreću se od 0,922 mg/kg do 3,653 mg/kg po uzorku. Rezultati sadržaja žive u tlu u 2016. godini su veći nego u 2014. i 2015. godini.

U većini uzoraka detektiran je povišen sadržaj ukupnih oblika teških metala u tlu i to *nikla*, čije se vrijednosti kreću od 67,37-1136,80 mg/kg, kao i *hroma* od 39,60 -329,70 mg/kg. U 2016. godini vrijednosti *kadmija* su povećane samo na jednoj lokaciji, što nije bio slučaj u istraživanjima iz 2014. i 2015. godine. To se smatra pozitivnim pokazateljem, koji upućuje na smanjenje zagađenosti tla u donjem toku rijeke Spreče tim teškim metalom.

Među mjerama prevencije i sanacije koje bi trebalo poduzeti je zabrana ili ograničenje proizvodnje određenih poljoprivrednih proizvoda na kontaminiranom zemljištu, zabrana ispuštanja otpadnih materija, te naplata troškova remedijacije kontaminiranog zemljišta i troškova poljoprivrednim proizvođačima. Ništa ne piše, ko je odgovoran i ko će platiti uništeno plodno zemljište. To se, valjda nikoga ne tiče... (izvor: <http://bk-gracanica.ba/>, 27. 2. 2017.)

**16. 2. 2017.****Novo trovanje rijeke Spreče – Drugi puta u mjesec dana 16.1. – 16.2. 2017. g.**

Kao i u ranijim slučajevima (a do sada ih je bilo bezbroj) novu ekološku katastrofu u rijeci Spreči uočili su gračanički ribari. "Prvo smo osjetili dobro poznati miris benzola a

nakon toga standardna slika. Velike količine ošamućene ribe plutalo je Sprečom dok je ostatak tražio spas na ušćima manjih pritoka gdje je bila dostupna veća količina kisika" izjavio je za lokalne medije sekretar Ribolovnog društva "Drijenča", Osman Hodžić. Trovanje su primijetili i ribari s područja općine Doboj Istok. Sumnja se da je i ovoga puta trovač "Global ispat" – Koksna industrija (GI-KIL) iz Lukavca. Incident je, kao i bezbroj sličnih na rijeci Spreči, prijavljen nadležnoj kantonalnoj i federalnoj inspekciji. (izvor: <http://bk-gracanica.ba/>, 27. 2. 2017.)

**28. 2. 2017.****Održana 5. sjednica Općinskog vijeća: usvojena odluka o proglašenju izbora u mjesnim zajednicama, odbijen prijedlog za člana Upravnog odbora Doma zdravlja**

I ovoga puta pokazalo se da su izbori nakon izbora, to jest poslije općinskih, izbori u mjesnim zajednicama važniji za političke stranke koje učestvuju u općinskoj vlasti, nego za obične građane. To je pokazala, s jedne strane slaba izlaznost i tradicionalno loš odziv građana na te izbore i veliko natezanje među vijećnicima oko verifikovanja rezultata tih izbora. Ipak, nakon puno potrošenog vremena i natezanja oko toga na prethodnim sjednicama, konačno je uz dva glasa protiv i jedan suzdržan usvojena Odluka o proglašenju izbora u mjesnim zajednicama.

Zanimljiva rasprava se razvila na rješenju o imenovanju člana Upravnog odbora Doma zdravlja Gračanica. Nadležno ministarstvo uputilo je prijedlog kandidata na usaglašavanje, bez ijedne riječi obrazloženja, što je ocijenjeno kao neozbiljan gest, pa je "akt vraćen predlažu" U nastavku sjednice je jednoglasno i bez rasprave usvojen izvještaj o realizaciji programa rada općinskog načelnika. Jednoglasno je usvojena izrada Akcionog plana jačanja socijalne zaštite i inkluzije djece i odraslih u općini Gračanica. Vijećnici su usvojili

i Izvještaj o izvršenim procjenama prometa nepokretnosti i prava za 2016. godinu kao i Informaciju o stanju zaštite od požara.

Nakon rasprave o ovogodišnjoj dodjeli stipendija učenicima srednjih škola i studentima, zaključeno je da svi kandidati sa istim brojem bodova, u svim kategorijama ostvare pravo na stipendiranje s tim da se u kategoriji "Socijalno ugroženi" poveća broj stipendija.

Do kraja sjednice je usvojena Informacija o realizaciji projekta regionalne sanitarne depozicije Doboj a Nacrt prostornog plana područja akumulacije Modrac je dobio saglasnost uz određene zaključke koji će biti upućeni nadležnom ministarstvu. (izvor: portal BKC)

### 8. 3. 2017.

#### **Pozitivna Gračanica – Firma "Kovan" na britanskom BBC-u**

Bosanskohercegovačka kompanija Kovan M.I. d.o.o. učestvuje u modernizaciji jedne škole u Velikoj Britaniji, a kroz program unapređenja energetske efikasnosti ugradnjom toplovodnih kotlova na pelet. Nije nepoznata da Kovan M.I. d.o.o. već nekoliko godina unazad izvozi toplovodne kotlove na pelet na tržište Velike Britanije. Ali, velika je čast i uspjeh, da vlasti u Velikoj Britaniji kotlove "Ekoline Kovan" na pelet uključe u projekat unapređenja energetske efikasnosti tamošnjih školskih ustanova. U okviru projekta energetske efikasnosti u Srednjoj školi "William Farr" u Weltonu, Lincolnshire, instalirano je pet "Ekoline Kovan" toplovodnih kotlova na pelet iz linije "Industry" (kotlovi snage od 150 kW i 200 kW). BBC je snimio prilog o energetske učinkovitosti i uštedama koje će Srednja škola "William Farr" ostvariti na godišnjem nivou, korištenjem "Ekoline" Kovan toplovodnih kotlova na pelet. Očekivane uštede ove škole za toplotnu energiju na godišnjem nivou iznose preko 180.000,00 GBP.

Projekat Srednje škole "William Farr" jedna je u nizu potvrda o kvalitetu "Ekoline Kovan" kotlova na pelet. Izvan svake sumnje

je da proizvodi ove građaničke tvrtke ispunjavaju najzahtjevnije evropske standarde u pogledu kvalitete i zaštite okoliša, kao i visoke standarde sigurnosti i propise o emisijama CO2 u Velikoj Britaniji. Zbog ovakvih uspjeha sasvim je jasna i neupitna leaderska pozicija Kovan M.I. d.o.o. na tržištu Bosne i Hercegovine (izvor: Klix.ba)

### 30. 3. 2017.

#### **Održana 6. sjednica Općinskog vijeća Gračanica: izvještaj o izvršenju Budžeta za 2016.**

Kako je izvijestio načelnik Helić, Budžet je ostvaren u iznosu od 13.333.666 KM ili 91,2 %. Ukupno izvršeni izdaci iznose 12.532.300 KM ili 13,54 % manje u odnosu na plan i manji su za 801.366 KM. Tih 801.366 KM predstavljaju suficit, višak prihoda nad izdacima. Pozitivno smo poslovali, iako je bila teška godina, posebno zbog izbora kada su svi nešto više tražili. Ostvaren je suficit, što je posebno bitno zbog rejtinga Općine kod fondova i banaka." Osim Budžeta, usvojen je u nacrtu Program kapitalnih investicija za period od 2016. – 2020 godine, uz zaključak da javna rasprava o njemu traje 30 dana. Od važnijih tačaka dnevnog reda, izdajamo još i Odluku o obavljanju pripravnčkog staža, koja je usvojena uz zaključak da se broj pripravnika povisi sa 48 na 51, te da općina obezbijedi iste uslove i za one koji se tokom godine naknadno pojave sa dokazom da su obezbijedili mjesto za "odradu" pripravnčkog staža. Uz ovo, usvojeni su još i izvještaji o radu u 2016. godini javnih ustanova Dječje obdanište "Naša djeca", Centra za socijalni rad i BKC-a., te Informacija o radu općinskog Suda u Gračanici za 2016. godinu a razmatrani su i planovi upisa učenika u prve razrede Gimnazije Dr. Mustafa Kamarić i Mješovite srednje škole Gračanica.

**7. 4. 2017.****“Gračanički glasnik” kao dobar primjer savremenog pristupa izučavanju lokalne historije – jedna od tema Međunarodne naučne konferencije na Filozofskom fakultetu u Tuzli**

Kako najvažniji događaj u okviru manifestacije Dani Filozofskog fakulteta u Tuzli, 7. aprila 2017. na tom fakultetu održana je Međunarodna naučna konferencija na temu “Savremeni izazovi i perspektive društvenih i humanističkih studija”. Na konferenciji je nakon plenarne, na devet odvojenih sesija (po naučnim disciplinama koje se izučavaju na fakultetu) prezentirano oko 140 naučnih i stručnih radova od preko 170 autora širokog spektra disciplina društvenih i humanističkih nauka iz Bosne i Hercegovine iz svih država prostora bivše Jugoslavije. Po broju prijavljenih radova to je najveća ikada na Univerzitetu u Tuzli održana naučna konferencija. Uz dobru organizaciju koju su ispoljili domaćini, prema ocjeni učesnika, Konferencija je ostvarila svoj glavni cilj: prezentacija dostignuća iz područja društvenih i humanističkih studija, međusobna razmjenu znanja, iskustava i ideja, intenziviranje saradnje između institucija i organizacija, te nalaženje zajedničkih rješenja za probleme sa kojima se susreće savremeno društvo.

U okviru 6. sesije “Historija” tematizirano je pitanje “Savremeni pristupi historiografije Bosne i Hercegovine, sa posebnim osvrtom na lokalnu historiografiju, njene domete i perspektive.” Od prezentiranih 7 naučnih radova (i 9 učesnika), ističemo rad prof. dr. Ize Šabotića (Filozofski fakultet u Tuzli) pod naslovom “Modaliteti i savremeni pristup u izučavanju lokalne historije – na primjeru časopisa “*Gračanički glasnik*” kao uvodnu temu za ovu sesiju. U svom prilogu prof. Šabotić je dao kratak osvrt na dostignuća ovog časopisa,

koji izlazi u kontinuitetu od 1996. godine (dva broja godišnje), njegov doprinos historijskoj nauci i dobroj praksi u izučavanju kulturne historije manjih zajednica i područja. U tom smislu, autor je dao niz komplimentata uredništvu i redakciji, koja više od dvije decenije “nosi” ovaj projekat. To se moglo čuti i u diskusiji i konačno u zaključcima ove sesije u kojim se “*Gračanički glasnik*” ističe kao dobar primjer edukacije, informisanja i edukacije, ali i očuvanja i njegovanja kulturno-historijske baštine u lokalnim zajednicama.

**18. 4. 2017.****Osmi po redu Međunarodni sajam poduzetništva i obrta “Grapos-Expo 2017” u Gračanicima.**

...svečano je otvoren u prisustvu brojnih visokih gostiju (političkih i diplomatskih predstavnika, ministara, te čelnika obrtničkih i privrednih komora). Na ceremoniji otvaranja obratili su se i prisutne pozdravili: direktor sajma Nedžad Nuhanović – u ime organizatora, Senad Hadžifejzović, direktor FACE TV, kao glavni medijski pokrovitelj, načelnik općine Gračanica Nusret Helić, te premijer Tuzlanskog kantona Bego Gutić, kao i član Predsjedništva BiH Bakir Izetbegović. Nakon svečanog presijecanja vrpce, član Predsjedništva, premijer TK, visoki predstavnik za BiH Valentin Inzko i općinski načelnik su sa delegacijama obišli izlagače i upoznali se sa bogatom sajamskom ponudom, koja uključuje 324 izlagača iz proizvodnog, uslužnog i javnog sektora. Nažalost, iako je bilo predviđeno da traje sve do 21. aprila, zbog naglog pogoršanja vremena i veće količine snijega koja je u toku noći pala, u jutro 20. aprila došlo je do obrušavanja konstrukcije jednog od sajamskih šatora, pa je organizator odlučio da zbog sigurnosti izlagača i posjetilaca sajam ovog puta prijevremeno zatvori.